



U d r u ž e n j e  
p o s l o d a v a c a

# BUSINESS

## Info Newsletter

**U ovom broju čitajte:**

- **Sastanak sa UIO: izvoznicima se priznaje i drugi način dokazivanja izvoza robe**
- **Dunović sa predstavnicima Vlade FBiH i Udruženja poslodavaca FBiH o usklađivanju Zakona o stečaju**
- **Održan sastanak Pregovaračkog tima za djelatnost metalne industrije UPFBiH**
- **Ministarstvo rada i socijalne politike FBiH podržalo većinu prijedbi UPFBiH na Zakon o štrajku**
- **UPFBiH i SSSBiH o Općem kolektivnom ugovoru**
- **Sastanak USAID-a i UPFBiH o Projektu reforme fiskalnog sistema**
- **Izmijeniti dijagnostički kriterije za ocjenu privremene spriječenosti za rad zbog bolesti, povrede ili drugih okolnosti**
- **Saradnja na projektu „Smanjenje i ukidanje parafiskalnih nameta na nivou BiH“**



## Sastanak sa UIO: izvoznicima se priznaje i drugi način dokazivanja izvoza robe

Zbog problema sa kojima se susreću izvoznici, 01. februara 2018. godine ponovno je održan sastanak u Upravi za indirektno oporezivanja, u Banjoj Luci. Sastanku su prisustvovali predstavnici Udruženja poslodavaca FBiH, direktor kompanije MC&WOOD, predstavnik ASA Šped-a, te predstavnici sektora za carine i sektora za PDV Uprave za indirektno oporezivanje.

Naime, Zakon o carinskoj politici BiH, iako je na snazi od 2015. godine, a kojim je predviđena elektronska razmjena podataka, se ne primjenjuje zbog nepostojanja provedbenih propisa.

Dok ne počne primjena navedenog zakona izvoznici su suočeni sa problemima prilikom dokazivanja da je izvezena roba stvarno napustila carinsko područje BiH, jer se prema postojećem rješenju iz Uputstva o postupku izvoza carinske prijave podnose u pisanom obliku. Takav način je prevaziđen, zastario, oduzima puno vremena, ali i sredstava, ne dovodi do poboljšanja kvaliteta carinskih kontrola i nije u skladu sa carinskim propisima drugih zemalja i zemalja Europske unije.

**Zbog neposjedovanja primjerka ovjerene carinske prijave u fizičkom obliku, izvoznici ne mogu dokazati stvarni istup robe sa područja BiH i ne mogu ostvariti pravo na povrat PDV-a.**

Nepoštivajući odredbe Uputstva o postupku izvoza, ovjereni primjerak carinske prijave se ne vrati deklarantu/špediteru, te samim tim, izvoznici, u velikom broju slučajeva, ne dođu u posjed iste. Zbog ovoga, izvoznicima se izriču prekršajne prijave i visoke kazne.



Svjesni problema, predstavnici Uprave za indirektno oporezivanje istakli su da se u praksi izvozniku koji ne može doći u posjed ovjerenog primjerka carinske prijave, u postupku prihvataju i drugi dokazi, kao što su ovjeren CMR, ovjereni faktura, i sl., odnosno dokazi iz kojih se može nedvojbeno utvrditi da je roba istupila sa područja BiH.

Ukoliko se u prvostepenom postupku ova dokumentacija ne prihvati kao dokazno sredstvo i donese rješenje o neprihvatanju podnesenih dokaza izvoznik može uložiti žalbu. Žalbe na prvostepene odluke carinskih i poreskih organa



rješava odjeljenje za pravne poslove UIO. Prema informacija Uprave za indirektno oporezivanje, ovo odjeljenje poništava rješenje prvostepenog organa o neprihvatanju podnesenih dokaza i ponovo vraća na prvostepeni postupak sa uputom da se još jedanput razmotre svi dokazi i donese odluka o razduženju izvoza.

**Veliki broj slučajeva je na ovakav način riješen i dokazano je da je roba izvezena na osnovu druge relevantne dokumentacije, koja nije ovjereni primjerak carinske prijave.**

**Molimo naše članice da, ukoliko budu imale problem sa neprihvatanjem ovakvog načina dokazivanja, nam se obrate.**



## Dunović sa predstavnicima Vlade FBiH i Udruženja poslodavaca FBiH o usklađivanju Zakona o stečaju

Na inicijativu potpredsjednika Federacije BiH Milana Dunovića u Kabinetu potpredsjednika FBiH održan je 20. februara 2018. godine radni sastanak sa predstavnicima Udruženja poslodavaca FBiH, te predstavnicima premijera Vlade FBiH i Ministarstva pravde FBiH.

Cilj sastanka je prioritetno usklađivanje postojećeg Zakona o stečaju sa presudom Ustavnog suda Federacije Bosne i Hercegovine, a koja je donesena prije gotovo dvije godine. Vlada Federacije BiH do sada nije poslala u parlamentarnu proceduru zakonsko rješenje koje je u skladu sa presudom Ustavnog suda Federacije BiH, na što je potpredsjednik više puta upozoravao. Insistirajući konstantno i beskompromisno na poštivanju odluka Ustavnog suda Federacije BiH, potpredsjednik Dunović predložio je da se pored usaglašavanja postojećeg Zakona sa presudom Suda, za što je Vlada Federacije BiH već odredila rok, izradi i nacrt novog Zakona o stečaju.

„Razloga za takav prijedlog je više, a nakon presude Ustavnog suda koja je vratila radnicima nadu u njihova prava, neophodno je voditi računa i o tome da se sve buduće stečajne procedure odvijaju na takav način da se negativne posljedice svedu na minimum, a zloupotrebe potpuno iskorijene. Jedan od partnera za razgovore o novom zakonskom rješenju su svakako poslodavci, koji se susreću sa realnim rješenjima, te samim tim i najbolje znaju na koji način stečajne procedure pokrenuti na vrijeme, sa kakvim kontrolnim mehanizmima, a da se omogući ostvarivanje radničkih prava uz



istovremenu mogućnost oporavka kompanija koje se nalaze u takvoj situaciji. Ukoliko Vlada Federacije BiH odluči da krene u ovom smjeru, spreman sam uzeti aktivno učešće u izradi Zakona o stečaju koji neće biti na štetu radničke klase, a kojim će se omogućiti ozdravljenje preduzeća u stečaju.

Zakovitost svih stečajnih procedura mora biti imperativ djelovanja svih aktivnih sudionika tih takvih procesa, a radnici poštovani i zaštićeni kao najveća vrijednost jednog zdravog, demokratskog društva", poručio je na sastanku potpredsjednik FBiH Milan Dunović.

## Sastanci sa potpredsjednikom FBiH i ministrom pravde FBiH o Zakonu o stečaju

Na inicijativu Udruženja poslodavaca FBiH tokom februara 2018. godine održani su odvojeni sastanci sa potpredsjednikom FBiH Milanom Dunovićem i sa ministrom pravde FBiH Matom Jozićem i saradnicima o Zakonu o stečaju FBiH.

Naime, krajem novembra 2017. godine Vlada FBiH je povukla iz parlamentarne procedure Nacrt zakona o stečaju uz obrazloženje da će najprije uputiti izmjene važećeg zakona u cilju usklađivanja istog sa presudom Ustavnog suda FBiH.

Direktor Udruženja poslodavaca FBiH Mladen Pandurević istekao je da se presude Ustavnog suda trebaju poštovati, međutim smatra da bi se donošenjem novog zakona konačno uklonila postojeća blokada stečajnih postupaka na terenu, odnosno, stečajni postupci bi ponovo zaživjeli.



Stoga, Udruženje poslodavaca FBiH traži od Vlade FBiH da Nacrt zakona o stečaju ponovno upiti u hitnu proceduru.

Na sastancima su predstavnici Udruženja ukazali na primjedbe na Nacrt zakon o stečaju koje će u formi amandmana dostaviti nadležnom ministarstvu.

Primjedbe Udruženja možete pogledati [OVDJE](#).



## Održan sastanak Pregovaračkog tima za djelatnost metalne industrije UPFBiH

Sastanak Pregovaračkog tima za djelatnost metalne industrije Udruženja poslodavaca FBiH održan je 12. februara 2018. godine, a sa ciljem otpočinjenja pregovora o potpisivanju Granskog kolektivnog ugovora o pravima i obavezama poslodavaca i radnika za djelatnost proizvodnje i prerade metala u FBiH. Sastanak je održan u skladu sa zaključcima posljednje sjednice Upravnog odbora UPFBiH na kojoj je rečeno da će se odmah pokrenuti pregovori za zaključivanje granskih kolektivnih ugovora i produženje važenja postojećih, kao i da će se pokrenuti inicijativa za potpisivanje preostalih kolektivnih ugovora.

Ovo je prvi sastanak na kojem su usaglašeni tehnički aspekti i dinamika vođenja procesa.

Članovi Pregovaračkog tima zaključili su da će se inicijativa za potpisivanje ugovora dostaviti Sindikatu metalaca FBiH najkasnije za tri sedmice od sastanka.



Udruženje poslodavaca FBiH je, u cilju poboljšanja i intenziviranja socijalnog dijaloga, ranije pozivalo sindikate da u dobroj vjeri i partnerskom duhu pristupe pregovaranju i potpisivanju granskih kolektivnih ugovora.



## Ministarstvo rada i socijalne politike FBiH podržalo većinu prijedbi UPFBiH na Zakon o štrajku

S ciljem usaglašavanja Zakona o štrajku 08. februara 2018 godine održan je sastanak predstavnika Udruženja poslodavaca FBiH i Ministarstva rada i socijalne politike FBiH.

Udruženje poslodavaca FBiH insistira da štrajk bude krajnji oblik rješavanja nastalih radnih sporova i to onda kada nije moguće da se spor riješi mirnim putem, odnosno nekim od oblika mirnog rješavanja.

Ministarstvo je većinu primjedbi Udruženja na Zakon o štrajku podržalo.



## Sastanak UPFBiH i SSSBiH o Općem kolektivnom ugovoru



Predstavnici UPFBiH, u skladu sa potpisanim Protokolom o vođenju pregovora za zaključivanje Općeg kolektivnog ugovora o izmjenama i dopunama OKU, pozvali su članove pregovaračkog tima Sindikata BiH na sastanak. Sastanak se održao u prostorijama Udruženja 08. februara

2018. godine, na kojem su nastavljeni pregovori o Općem kolektivnom ugovoru FBiH, a sa ciljem poštivanja dobre prakse kolektivnog pregovaranja.





## Sastanak USAID-a i UPFBiH o Projektu reforme fiskalnog sistema

S ciljenjem poboljšanja poslovnog ambijenta u Federaciji BiH kroz reformu oblasti parafiskalnih taksi i naknda 15. februara 2018. godine održan je sastanak direktora Udruženja poslodavaca FBiH Mladena Pandurevića i šefa USAID-ovog Projekta reforme fiskalnog sistema (FAR) Marka Campbella. Sastanku su prisustvovali i USAID-ov analitičar fiskalne politike Admir Čengić i pravnica UPFBiH Jasmina Kurspahić.

Federalno ministarstvo finansija je u saradnji s USAID-ovim projektom Reforme fiskalnog sektora izradilo interaktivni Registar taksi i naknada u Federaciji BiH s Uputom za korištenje Registra, koji predstavlja pregled taksi i naknada koje se plaćaju za registraciju firme i tijekom njenog poslovanja, te pruža mogućnost pregleda taksi i naknada koje su obavezne za sve privredne subjekte, kao i onih koje se plaćaju za korištenje određenih dobara.

Registar parafiskalnih nameta trebao bi olakšati privrednicima snalaženje šta su obavezni plaćati, a šta ne. Direktor UPFBiH Mladen Pandurević, međutim, ističe da registrom ipak nisu obuhvaćeni svi parafiskalni nameti, te da je neophodno definisati principe za naplatu parafiskalnih nameta, odnosno, da visina taksi trebaju biti usklađene sa dobijenim uslugama.

Udruženje poslodavaca FBiH već godinama upozorava vlasti da su brojni parafiskalni nameti bez osnova propisani zakonom, te da je racionalizacija i redukcija broja parafiskalnih nameta rješenje za poboljšanje poslovnog ambijenta u BiH.

## Izmijeniti dijagnostički kriterije za ocjenu privremene spriječenosti za rad zbog bolesti, povrede ili drugih okolnosti

Udruženje poslodavaca FBiH je 12. februara 2018. godine organizovalo sastanak sa ciljem izmjene dijagnostičkog kriterija za ocjenu privremene spriječenosti za rad zbog bolesti, povrede ili drugih okolnosti koji je sastavni dio Pravilnika o postupku i kriterijima za utvrđivanje privremene spriječenosti za rad osiguranika.

Sastanku su prisustvovali specijalisti medicine rada mr.sc.dr. Elma Ibrahimpašić iz Eurupharma i prim.dr. Ravijojla Cvijetić, član Prvostepene komisije za produženje bolovanja Zavoda za medicine rada, doc.dr.sci.med. Meliha Pozderac – Memija, šef Katedre za medicinu rada Medicinskog fakulteta u Sarajevu, direktor Udruženja poslodavaca FBiH i sekretar Udruženja Mersiha Jusić.



Tema sastanka je bila izmjena kriterija za

ocjenu privremene spriječenosti za rad zbog bolesti povrede ili drugih okolnosti na radu. Prisutni na sastanku su se složili da su kriteriji za ocjenu privremene spriječenosti za rad veoma nefikasni i da su neophodne izmjene.

Prijedlog Udruženja poslodavaca u FBiH je da se ocjena sposobnosti veže za radno mjesto te da se kriteriji razvrstaju u dvije grupe i to za radna mjesta sa posebnim

uslovima rada i radna mjesta bez posebnih uslova rada.

Predstavnice zdravstvenih institucija su ocjenile opravdanim zahtjeve UPFBiH i izrazile spremnost i učešće u izrad Prijedloga izmjene Dijagnostički kriterij je neophodno izmijeniti u cilju sprečavanja instituta zloupotrebe bolovanja zaštite poslodavaca u ovim slučajevima.

Udruženje poslodavaca FBiH će inicijativu koju će sačiniti stručni tim specijalista medicine rada uputiti nadležnim institucijama.

## **Saradnja na projektu „Smanjenje i ukidanje parafiskalnih nameta na nivou BiH“**

Mubera Brković i Svjetlana Kurteš iz PricewaterhouseCoopers d.o.o, kao i Samra Šuškić, menadžer projekat „Podrška reformama u BiH" održali su sastanak sa direktorom Udruženja poslodavaca FBiH.

Na sastanku je razgovarano je o mogućnostima saradnje na projektu o parafiskalnim nametima.

Naime, Racionalizacija i smanjenje parafiskalnih naknada na državnom nivou je dio projekta podrške reformi poreskog sistema u BiH, koji Britanska ambasada u Bosni i Hercegovini implementira putem Fonda za dobro upravljanje (Good Governance Fund).

U prvoj fazi projekta uspostavljen je registar neporeskih naknada, koje prikupljaju različite institucije na nivou BiH.

Nastavak projektnih aktivnosti ima za cilj racionalizaciju, smanjenje ili ukidanje



određenog broja ovih naknada.

Mišljenje poslovne zajednice i konkretni primjeri parafiskalnih naknada koji najviše opterećuju poslovanje, bez jasno vidljive svrhe njihovog postojanja, od velikog su značaja za nastavak projektnih aktivnosti i pristup nadležnim institucijama u pokušaju da se određene naknade smanje ili u potpunosti ukinu, kazala je Brković.

Direktor Udruženja poslodavaca FBiH Mladen Pandurević istekao je da Udruženje aktivno godinama radi na smanjenju i ukidanju parafiskalnih nameta, te da će i ovom projektu, kroz slanje upitnika članicama, rado pomoći, kao i da se nada nastavku dobre saradnje.

## **Konstituirajuća sjednica Savjetodavnog odbora projekta „Promocija dualnog obrazovanja na osnovu pilot projekta i edukacije“**

Konstituirajuća sjednica Savjetodavnog odbora projekta „Promocija dualnog obrazovanja na osnovu pilot projekta i edukacije“, održana je 16. februara 2018. godine u prostorijama Udruženja poslodavaca FBiH, vodećeg aplikanta.

Sastanku su prisustvovali predstavnici Srednjoškolskog centra Vogošća, Srednje škole za saobraćaj i komunikacije,



općina Novi grad Sarajevo, Novo Sarajevo i Vogošća, kao i predstavnici Ministarstva obrazovanja KS, Službe za zapošljavanje KS i kompanije Centrotrans.



Koordinator Projekta Zlatan Dedić upoznao je članove Savjetodavnog odbora sa zadacima Odbora, odnosno sa planom aktivnosti na osnovu kojeg je predviđena realizacija Projekta.

Cilj projekta je podizanje kapaciteta institucija i kompanija za zakonsko regulisanje, provođenje i promociju dualnog obrazovanja. Kroz dizajnirani i implementirani pilot projekat 20 učenika srednjih strukovnih škola bi bilo osposobljeno i zaposlilo se kod poznatog poslodavca. Pilot projekat je osnova za izradu materijala koji bi se koristio u promotivnoj kampanji o benefitima dualnog obrazovanja.

## Sastanak o Međunarodnom sajmu sporta

Projekt menadžer Agencije za marketing i promociju sporta Enes Salihović posjetio je Udruženje poslodavaca FBiH i tom prilikom razgovarao sa direktorom Udruženja Mladenom Pandurevićem o multidisciplinarnom i multifunkcionalnom međunarodnom sajmu sportske industrije.

Naime, Međunarodni sajam sporta, sportske opreme, lova i ribolava održat će se 08-13. maja 2018. godine u Olimpijskom kompleksu dvorana Zetra. Na sajmu će biti predstavljeno 80 sportskih disciplina i oprema za sportske discipline, lov i ribolov. Na jednom mjestu će se okupiti sportaši, proizvođači sportske opreme, trgovci sportskom opremom i korisnici sportske opreme što će omogućiti proširenje postojećeg proizvodnog programa, direktna strana ulaganja i otvaranje novih radnih mjesta.



Na ovom sajmu će svaki dan njegova trajanja biti upriličen niz naučnih i stručnih predavanja na mnoge teme koje spajaju čovjeka sa sportskom industrijom, ali i pružena prilika svim zainteresovanim da učestvuju na Business Development Day programu koji će se održati 10.05.2018. godine, a jedinstvena je prilika koja izlagačima nudi mogućnost da predstave svoje projekte i poslovne ideje domaćim i inostranim investitorima.

Projek menadžer Agencije je pozvao Udruženje da bude partner na investicijskom sajmu, te da zainteresovanim članicama uputi poziv kako bi se predstavile stranim investitorima.





## Direktor UPFBiH na regionalnoj konferenciji o jačanju socijalne dimenzije zemalja Zapadnog Balkana i Turske

Direktor Udruženja poslodavaca FBiH Mladen Pandurević učestvovao je na regionalnoj konferenciji "Boosting the social dimension in the Western Balkans and Turkey – the contribution of economic governance to decent work and life", održanoj 31. januara 2018. godine u Beogradu. Konferencija je podržala zajedničke napore EU i zemalja u procesu proširenja za poboljšanje ekonomske i socijalne situacije svih građana Zapadnog Balkana i Turske.

S obzirom da proces ekonomskog upravljanja za zemlje proširenja EU ove godine ulazi u svoju treću godinu, te da provođenje reformi napreduje, na konferenciji su sagledana dosadašnja



postignuća i iskustva. Navedeni pregled i zaključci ove konferencije će pomoći u razvijanju srednjoročne perspektive za dalje jačanje i ubrzavanje provođenja reformi rada i poboljšanja života građana u regionu, sa fokusom na primjenu reformi i merljivim ishodima.

Na početku konferencije razmatran je pozitivan trend zapošljavanja i društveni trendovi na Zapadnom Balkanu i Turskoj, nakon čega su uslijedile tri tematske sesije o najprimjerljivijim i zajedničkim izazovima zemalja, kao i panel diskusija o sprovođenju reformi kroz ekonomsko upravljanje.



## Nastavak dobre saradnje Vlade Kantona Sarajevo i Udruženja poslodavaca KS

Na inicijativu Udruženja poslodavaca Kantona Sarajevo vezanu za smanjenje komunalnih nameta s ciljem olakšavanja poslovanja privrednicima, 07. februara 2018. godine je premijer KS Elmedin Konaković sa ministrima Marijom Nenadićem, Senadom Hasanspahićem, Jasminom Halebićem i Muharemom Šabićem održao radni sastanak ovim povodom s predstavnicima ovog udruženja, koje je predvodio njihov predsjednik Safudin Čengiđ. U ime ovog udruženja aktivno učešće na današnjem sastanku su imali i privrednici Nijaz Skenderagić, Muhamed Žero, Zlatan Dedić i Enver Malagić.

Sastanku je prisustvovao i direktor KJKP „Rad“ Selim Babić, zbog toga što se primjedba poslodavaca prevashodno odnosila na trenutnu nepravednu metodologiju utvrđivanja iznosa, odnosno cijene za odvoz otpada privrednim subjektima, kako su istakli, jer se ona obračunava po kvadratnom metru njihovog poslovnog prostora.



„Cilj Vlade KS je smanjenje, subvencioniranje, ali i djelimično ili potpuno ukidanje ovakvih i sličnih nameta privrednicima, kako bismo olakšali vaše poslovanje, omogućili proširenje vaših poslovnih aktivnosti, a time i konkretno vas stimulisali na veće

zapošljavanje trenutno nezaposlenih osoba u našem Kantonu", istakao je premijer Konaković.

Najavio je da će u narednim danima doći do izmjena postojećeg cjenovnika usluga KJKP „Rad“ kojim će se u dogovoru sa Udruženjem poslodavaca KS i predstavnika ovog komunalnog preduzeća te koordinaciju resornih ministara komunalne privrede i prostornog uređenja izvršiti korekcija aktuelnog načina obračuna, time i cijena za izvršenje usluge odvoza komunalnog otpada, a na koje će saglasnost dati Vlada KS.

Direktor Babić je prihvatio ovu inicijativu privrednika smatrajući da je trenutna metodologija obračuna nije najpravednija te da je u interesu i preduzeća koje predvodi da se uspostavi pravedniji metod naplate njihovih usluga.



Ovom prilikom je istaknuto kako se radi o privremenom i prelaznom rješenju koje bi trebalo postati sistemsko s donošenjem zakona o lokalnoj samoupravi.

U ime Udruženja poslodavaca, privrednik Nijaz Skenderagić je pohvalio dosadašnju saradnju aktuelne Vlade i privrednika te naglasio kako ona treba da bude najbolji primjer svima drugima u našoj zemlji Bosni i Hercegovini.





## ESV KS: Nezaposleni ne mogu biti na birou do kraja života i odbijati poslove

Ekonomsko-socijalno vijeće za područje Kantona Sarajevo na sjednici održanoj 30. januara 2018. godine razmatralo je radnu verziju Nacrta zakona o posredovanju u zapošljavanju i socijalnoj sigurnosti nezaposlenih osoba u ovom kantonu, na koju su primjedbe dostavili i sindikati i poslodavci.

Predsjedavajuća ESV-a i ministrica za rad, socijalnu politiku, raseljena lica i izbjeglice Kantona Sarajevo Amela Dautbegović rekla je da bi novim zakonom trebalo biti osigurano da ljudi ne mogu biti na evidencijama nezaposlenih do kraja života i odbijati poslove, a istovremeno raditi nacrno.

Naglasile je da će o pomenutom nacrtu biti održana i tematska sjednica nakon čega će biti upućen u Vladu i Skupštinu, što očekuje da se desi uskoro.

Predsjednik Udruženja poslodavaca KS Safudin Čengić istakao je da su pripremili određene sugestije na nacrt zakona od kojih je najvažnija da Služba za zapošljavanje bude posrednik u zapošljavanju između nezaposlenih i poslodavaca, a ne socijalna služba.

Dodao je da bi evidencijama nezaposlenih trebali biti samo oni koji aktivno traže posao i spremni su na dokvalifikaciju i prekvalifikaciju kako bi došli do posla.

Predsjednik Kantonalnog odbora Saveza samostalnih sindikata KS Franjo Rener naveo je da u takav zakon treba uključiti sva pravila iz konvencija o pravima radnika koje je



BiH ratifikovala budući da su te konvencije iznad domaćeg zakonodavstva.

Ministrica Dautbegović je potcrtala da je cilj donošenja zakona o udžbenicima u KS to da udžbenici budu jedinstveni za sve škole i da važe bar četiri godine.

Također, na ESV-u se raspravljalo i o Izjašnjenju Ministarstva komunalne privrede i infrastrukture KS od 26. decembra 2017. na inicijativu Udruženja poslodavaca KS za donošenje zakona o izmjenama i dopunama Zakona o komunalnim djelatnostima, kao i o Informaciji o kolektivnim ugovorima evidentiranim u Ministarstvu za rad, socijalnu politiku, raseljena lica i izbjeglice Kantona Sarajevo.



## **Nova članica Udruženja poslodavaca FBiH - Udruženje poslodavaca BPK Goražde**

Udruženje poslodavaca BPK Goražde osnovano je 2005. godine kao dobrovoljna neprofitna organizacija poslodavaca koja štiti i promovira prava i interese svojih članova.

Udruženje poslodavaca je osnovala grupa uglednih goraždanskih privrednika, s ciljem da postane legitiman, nezavisan i snažan glas poslodavaca i poduzetnika u uslovima tripartitnih demokratskih odnosa.

Utemeljeno na načelima slobode udruživanja UPBPK Goražde štiti interese svojih članova radeći na stvaranju povoljnijeg ekonomskog okruženja i promovirajući prava i slobode svojih članova.

Cilj Udruženja je da kroz tripartitni i bipartitni dijalog ili na druge načine, sa Vladom kantona i sindikatima aktivno učestvuje u kreiranju zakonske regulative radi stvaranja uslova za poboljšanje i razvoj poslovnog okruženja u Bosansko-podrinjskom kantonu Goražde.

Udruženje poslodavaca BPK Goražde je osnovano na kantonalnom nivou i jedini je legitimni zastupnik poslodavaca u odnosu prema Vladi BPK i sindikatima.

Udruženje poslodavaca je jedan od socijalnih partnera u tripartitnim odnosima na teritoriji BPK Goražde. Potpisivanjem sporazuma o osnivanju Ekonomsko-socijalnog vijeća za teritoriju BPK Goražde 2006 godine, Udruženje poslodavaca BPK Goražde, Vlada BPK Goražde i Savez samostalnih sindikata BPK Goražde postaju ravnopravni

partneri koji konzensusom donose odluke i rade na donošenju novih ili izmjenama postojećih zakona iz oblasti ekonomske i socijalne politike.


Konačni cilj, iz perspektive UPBPK Goražde, je ojačati svoje članice, ali i cijeli privatni sektor za konkurenciju koja ih čeka ulaskom BiH u Europsku uniju.

## MAKROEKONOMSKI INDIKATORI—posljednji kvartal 2017. godine

### ZAPOSLENOST PO SEKTORIMA—NOVEMBAR 2017.

U novembru 2017. godine ukupan broj zaposlenih u FBiH iznosio je 474,569, što predstavlja povećanje broja zaposlenih za 0,2% u odnosu na prethodni mjesec.

U odnosu na godišnji prosjek broja zaposlenih u 2016. godini došlo je do povećanja broja zaposlenih za 3,6%.





## INDEKS POTROŠAČKIH CIJENA— DECEMBAR 2017.

Potrošačke cijene u decembru 2017. godine, u prosjeku, se nisu promjenile u odnosu na prethodni mjesec.



Posmatrano po odjeljcima Klasifikacije lične potrošnje prema namjeni, cijene su porasle u odjeljcima: Prijevoz za 0,9% i Stanovanje, voda, električna energija, plin i drugi energenti za 0,1%.

Cijene su niže u odjeljcima: Odjeća i obuća za 2,5%; Ostala dobra i usluge 0,3%; Namještaj, kućanski uređaji i redovno održavanje kuće i Zdravstvo 0,2% i Alkoholna pića i duhan i Rekreacija i kultura za 0,1%. U ostalim odjeljcima cijene se nisu značajnije mijenjale u ovom mjesecu.

U decembru 2017. godine u odnosu na decembar 2016. godine, cijene su više za 1,9% (godišnja inflacija).


## INDEKSI CIJENA PROIZVOĐAČA INDUSTRIJSKIH PROIZVODA—DECEMBAR 2017.

### Ukupan indeks cijena proizvođača industrijskih proizvoda

U decembru 2017. godine ukupan indeks cijena proizvođača industrijskih proizvoda je viši za 0,2% u odnosu na prethodni mjesec. Posmatrano prema glavnim industrijskim

grupacijama indeks cijena Intermedijarnih proizvoda osim energije je viši za 0,7%, a Energije za 0,5%. Pad indeksa cijena registrovan je u grupaciji Kapitalnih proizvoda za 0,3%. U ostalim grupacijama indeksi cijena se nisu mijenjali. Posmatrano prema područjima KD-a, indeks cijena u području Prerađivačke industrije je viši za 0,4%, a u području Proizvodnje i snabdijevanja električnom energijom, plinom, parom i klimatizaciji je viši za 0,2%. U području Vađenja ruda i kamena indeks cijena se nije mijenjao.


Posmatrano po oblastima, najveći rast indeksa cijena je registrovan u oblasti Proizvodnje koksa i



rafiniranih naftnih proizvoda za 2,9%. Najveći pad indeksa cijena registrovan je u oblasti Proizvodnje gotovih metalnih proizvoda, osim mašina i opreme za 0,8%. U ostalim oblastima indeksi cijena se nisu značajnije mijenjali. Ukupan indeks cijena proizvođača industrijskih proizvoda u decembru 2017. godine je viši za 5,4% u odnosu na isti mjesec prethodne godine. Prosječan indeks cijena proizvođača industrijskih proizvoda u 2017. godini je viši za 3,4% u odnosu na prosjek 2016. godine.

### Indeks cijena proizvođača industrijskih proizvoda na domaćem tržištu

U decembru 2017. godine indeks cijena proizvođača industrijskih proizvoda na



domaćem tržištu je viši za 0,1% u odnosu na prethodni mjesec, a u odnosu na decembar 2016. godine je viši za 3,3%.

U ovom mjesecu najveći rast indeksa cijena registrovan je u oblasti Proizvodnje baznih metala za 1,0%. Najveći pad indeksa cijena registrovan je u oblasti Proizvodnje električne opreme za 2,7%. U ostalim oblastima indeksi cijena se nisu značajnije mijenjali. Prosječan indeks cijena proizvođača industrijskih proizvoda na domaćem tržištu u 2017. godini je viši za 1,5% u odnosu na prosjek 2016. godine

### **Indeks cijena proizvođača industrijskih proizvoda na inozemnom tržištu**

U decembru 2017. godine indeks cijena proizvođača industrijskih proizvoda na inozemnom tržištu je viši za 0,5% u odnosu na prethodni mjesec, a u odnosu na decembar 2016. godine je viši za 8,2%.

U ovom mjesecu najveći rast indeksa cijena je registrovan u oblasti Proizvodnje koksa i rafiniranih naftnih proizvoda za 4,0%. Najveći pad indeksa cijena registrovan je u oblasti Proizvodnje i snabdijevanja električnom energijom, plinom, parom i klimatizaciji za 9,1%. U ostalim oblastima indeksi cijena se nisu značajnije mijenjali.

U ostalim oblastima indeksi cijena se nisu značajnije mijenjali.

Prosječan indeks cijena proizvođača industrijskih proizvoda na inozemnom tržištu u 2017. godini je viši za 5,8% u odnosu na prosjek 2016. godine.

Podaci su preuzeti sa [www.fzs.ba](http://www.fzs.ba).

## PROSJEČNA NETO PLAĆA—NOVEMBAR 2017.

Prosječna  
mjesečna  
isplaćena  
neto-plaća po  
zaposlenom  
za novembar  
2017. godine,  
u Federaciji  
BiH, iznosi  
868 KM i  
nominalno je



viša za 0,6%, a realno za 0,5% u odnosu na prethodni mjesec.

U odnosu na isti mjesec prethodne godine, prosječna mjesečna isplaćena neto-plaća po zaposlenom za novembar 2017. godine, nominalno je viša za 2,0%, a realno za 0,1%.

## Najava događaja

**Udruženje poslodavaca FBiH 13. marta 2018. godine u Hotelu Bosnia, u Sarajevu, organizuje okrugli sto na temu „Dualno obrazovanje u FBiH-učenje temeljeno na radu“.** Planirano je da učesnici okruglog stola budu predstavnici institucija obrazovanja i poslodavci.

Osnovni cilj organizovanja okruglog stola je da se kroz dijalog sa nadležnim institucijama vlasti, otvori diskusija o zajedničkim ciljevima i zadacima vezanim za reformu obrazovanja.





U d r u ž e n j e  
poslodavaca

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**